

編號01號

【甘蔗下个蟬仔】羅紫云原作

屋脣該埕¹竹甘蔗²種幾下年咧，當大叢，斬忒又會過綻筍繼續煞猛生到青里里仔，長目多汁，清甜好食。

逐年大體對五月開始，日日到臨晝仔，就會有一群著等青衫，當靚、當得人惜，頭大尾尖、翼長个草蟬，細細仔像手指尾恁大隻定定，黏在這長長青色个甘蔗葉下，盡命牯在該啦歌哩曲，鬧熱煎煎。佢兜總係唱等：「揸揸揸咿³——揸揸揸咿——」甜美个歌聲，一直到下晝兩點零正會煞棚，完全無喊恏。

草蟬下班，續等嫲牯蟬⁴跔等上棚，毋過，嫲牯蟬係黏在竹甘蔗脣該叢榮榮个苦楝樹頂，佢算係最大隻个蟬仔，膺身著等一身烏色个西裝盡派頭，大聲唱等屬於佢兜个愛戀歌：「蟬——蟬蟬蟬！蟬——蟬蟬蟬！」佢兜做下背等一臺自家製造个放送頭⁵，亮亮个聲放送到盡遠都聽得著。佢心情好个時節，就安腦佢兜唱歌仔當好聽，心情毋好時，又試著佢兜吵耳塞窟。但係一想著佢兜

來到這世界上，斯有短短幾日仔，就當佩服佢兜恁勇敢、恁煞猛打拚个精神，來完成唯一愛做个聲事⁶——傳宗接代，該就無麼个好怨嘆，乜原諒佢兜个嘶胥另命咧。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，曉得照順序、有條理，成時獨唱、成時合唱輪等來，像有人指揮樣，聲音有嘹亮、低沉；時大、時細，所發出个聲無幾共樣，有个較尖；有个較溫柔。其實，蟬仔有當多種，有一年、三年、五年、十三年、十七年个，長年都戴在泥竇肚不見天日。在暗摸摸个烏泥裡肚，培養破土个熱情；在多年个等待中，化地底个能量做聲量，衝破重圍飛出來，就係為著這短短幾日个自由。

佢心肝肚緊想：這埕甘蔗無施肥，敢係因為聽了蟬仔熱情嘹亮个歌聲，正緊生緊高緊榮？該恁人，乜愛像蟬仔恁知足，知恩圖報，逐日天轉笠嫲花，這一生人就多姿多彩咧！

¹ 埕：音 pu；量詞，堆。

² 竹甘蔗：音 zhug gam` zha`；綠皮的甘蔗。

³ 揸揸揸咿：音 rham⁺ rham⁺ rham⁺ rhi；草蟬的叫聲。借字。

⁴ 嫲牯蟬：音 ma gu` sham；此指臺灣熊蟬。

⁵ 放送頭：音 fong` sung` teu；麥克風。

⁶ 聲事：音 shang` she⁺；工作。

編號02號

【金黃色个旅行】曾雪蓉原作

旅行係一種當好个休閒活動，做得分人心情鬆爽，又做得摺最靚个回憶留下來，另外旅行也係一種學習，有一句話講：「行萬里路，贏過讀萬卷書」，在旅行个時節，一路看著个、聽著个，可能比在書寶肚學著个還較精彩、生趣。

在印象裡肚，佢最懷念个一擺旅行，係前幾年俾八月半个時節，爺哀帶佢歸屋下人去花蓮遠寮。

佢兜來到花蓮富里个六十石山，一路上感覺花蓮个空氣特別好，一聲又一聲大鷄婆歡喜又自在个歌聲，響在彎彎幹幹个山路町，佢兜盤飛在高高个雲頂，打開梟雄个翼胛，無分日夜在這遍山頭巡邏，佢兜係這遍天地个山大王，也係保護者。

等阿爸摺車仔停在忘憂亭，佢一下車就看著滿山滿坪个金簪花¹開到當閘、當打眼，想起識在電視裡肚看過一隻紹介花蓮金簪山个節目，講這位係一隻靚到會分人「發狂」个所在，這句話正經半點都毋會爭差。在佢企在這高高个涼亭時節，看著歸遍个山頭，變成金黃色个世界，帶等泥香、野花香个山風在對面吹過來

該下，毋知仰般，佢个心肝頭就有一種感動還有幸福个感覺，佢想這就係大自然个力量。

阿爸講：「前人種樹後人涼；前人種竹後人搖。」這山頭个金簪花，係盡多前人開山打林開墾出來个，所以來到這邊寮个時節，愛曉得珍惜，毋單淨愛摺這美景用相片帶轉屋下，也愛摺自家个垃圾處理好，恁樣年年正有靚靚个風景好欣賞啊！

在夕陽像一隻啾紅个柑仔，掛在天邊个時節，本旦開到盡有精神个金簪花，像約定好共下下班樣，全眨等目珠互相偎憑，恬恬仔睡忒咧；難怪金簪花又安到「一日美人」，佢跔等朝陽跣床，又在日頭落山時節，合起佢錫人个花裙，做一隻靚一日个美人。

時間過忒盡久，成時佢還係會想起該擺「金黃色个旅行」，當像又聽著大鷄婆歡喜个歌聲，盡久……盡久。

¹ 金簪花：音 gim` zam` fa`；金針花。

編號03號

【盡風神个社團活動】劉純汝原作

兩年前正開學時節，拿著社團選擇單，哇！一拖拉庫¹呢，有服務隊、排球隊，還有童軍團、熱舞社……，該兩時，毋知選哪隻正好？欸！「西洋劍隊」，佢目珠一金，仰恁沙鼻、恁風神个名仔喎？「嗯，就選你咧！」

這下想起入團隊个第四隻月，佢總算有機會參加全國比賽。換佢上場咧，劍衫拉好勢，面落仔膠手套仔乜戴好勢，夾起電衫跔正馬步，盡拚囉！比賽一開始，佢拿等劍盡命牯滑步搶前進攻，使出蠻力拂啊拂仔。告知，佢長刺佢撥擋、佢飛刺佢敲劍……，阿姆哀！總係分佢閃淨淨，戰術乜分佢看透透！佢當緊張，手腳亂忒咧，節奏乜亂忒咧；對手密密咻！咻！咻！咻，佢嘎緊揮空緊失分，輸到貼貼！

佢一比煞，軟怠怠个雙腳黏時就跪落地，無命个「啊」一聲，就像氣凹凹个相打雞，落喪落喪²！原旦个自信怕係走到天頂膠白雲搞園人尋去咧！

貼心个劍隊伴仔，全都行兼佢——有人送涼水、有人撚背

囊、還有人膠佢捕纏纏，教練乜柔柔仔安慰佢講：「人生有時星光有時月光，你打到當慶咧，下二擺再過加油！」目汁強強會忍毋核个佢，深深感受著佢兜當像冷天个細日頭，佢心肝肚黏時燒暖燒暖！

人講：「臺頂三分鐘，臺下十年功。」正經有影，聽起來恁風神个「西洋劍」，做起來無恁該！除忒考反應、比體力，還愛動腦筋、想戰術。這兩年來，一擺又一擺毋係你贏就係佢輸个比賽，分佢學習著：仰般面對失敗、面對毋堪斗个自家；仰般面對問題、解決問題。佢當煞猛打拚，發揮客家人硬頸精神个本等，練好基本功，抓提要領，十年接一劍！佢个劍術緊來緊進步咧，武藝比得古代个花木蘭哩啲！

「西洋劍」係源自十七世紀个歐洲，乜係奧運項目之一；有分鈍劍、銳劍、軍刀三種，競賽員在比賽時節，企在金屬枋仔頂高个兩片析準備等，用劍頭先刺著對手有效个部位就算得分，巔蠻有速度感膠爆發力。

「西洋劍」毋單淨培養專注力、思考力，還有觀察力膠判斷力，還係「盡風神」个社團活動唷！

¹ 拖拉庫：音 to⁺ la ku[~]；語源於日語「トラック」，卡車，此文形容很多之意。

² 落喪落喪：音 log^{`</sup> song<sup>`} log^{`</sup> song<sup>`}；表垂頭喪氣之意。